

GARIZUMAKO III. IGANDEA (C)

Otoitza

Errukiaren Aita eta on guztien iturria zaren Jauna,
baraua, otoitza eta limosna
ipintzen dizkiguzu geure bekatuen sendagarri;
begira bihotz onez
bere ahuleria aitortzen duen zeure herriari,
eta bizkor gaitzazu, zeure erruki haundiz,
bekatuaren zamapean aurkitzen garenok.
Zure Seme Jesu Kristo.

I. IRAKURGAIA: Ex 3, 1-8a. 13-15

«Ni-naiz»ek bidali nau zuengana.

Exodo liburutik

Egun haietan, Moises, bere aitagarreba Jetroren, Madiango apaizaren, ardiak zaintzen zebilen; basoaz beste aldera eramane zituen, eta Horeba, Jainkoaren mendira, iritsi zen. Han Jaunaren aingerua agertu zitzaion, sasi artetik ateratzen zen sugar batean. Moisesek begiratu zuen, eta sasia, sutan egonik ere, ez zen erretzen.

Orduan Moisesek esan zuen: «Banoa gauza harrigarri hau ikustera: nolaz ez den sasia erretzen». Ikusi zuen Jaunak, bazihoala begiratzera, eta dei egin zion sasi artetik, eta esan: «Moises, Moises!» Honek erantzun: «Hemen nauzu!» Eta Jaunak: «Ez hurbildu; ken oinetakoak, lur santua da eta zu zauden tokia».

Eta esan zion gainera: «Ni zure gurasoen Jainkoa naiz, Abrahamen Jainkoa, Isaaken Jainkoa eta Jakoberen Jainkoa». Orduan Moisesek aurpegia estali zuen, Jainkoari begiratzeko beldurrez.

Jaunak esan zion: «Ikusi ditut Ejipton dagoen nire herriaren nekeak, entzun ditut haien marmarrak, beren langilezainen aurka; ezagutu ditut haien oinazeak. Beraz, jaitsi egin behar dut, ejiptoarren eskuetatik nire herria ateratzeko, eta lur hartatik lur on eta zabalera igo erazteko, esnea eta ezia darion lurraldera».

Moisesek esan zion Jainkoari: «Bai, Jauna, joango naiz israeldarengana, eta esango diet: "Zuen gurasoen Jaungoikoak bidali nau zuengana". Eta haiek galdetzen badidate: "Nola du izena?", nik zer erantzun behar diet?» Jaungoikoak Moisesi: «Naizena naiz Ni. Eta honela esango diezu israeldarrei: "Ni-naiz"ek bidali nau zuengana».

Jainkoak gainera esan zion Moisesi: «Honela hitzegin behar diezu israeldarrei: "Jaunak, zuen gurasoen Jainkoak, Isaaken Jainkoak, Jakoberen Jainkoak, bidali nau zuengana. Hau da nire izena behin betirako; honela deituko nauzue menderen mendeetan"».

ERANTZUN SALMOA: Sal 102, 1-2. 3-4. 6-7. 8 eta 11

V/. Errukior da Jauna eta kupibera.

Ene arima, goretsazu Jauna,
neure barren osoak Haren izen deuna.
Ene arima, goretsazu Jauna,

eta ez ahaztu Hark zuri egina. R/.

Hark barkatzen baititu zure hobenak,
sendatzen zure gaitzak denak;
begiratzen du heriotzatik zure bizia,
ematen dizu buruntzat grazia eta errukia. R/.

Jaunak egintza zuzenak ditu egiten,
zapaldu guztiei berena die itzultzen.
Erakutsi zion bere bidea Moisesi,
Berak eginak Israelgo seme-alaba guztiei. R/.

Errukior da Jauna eta kupibera,
berant-haserre eta guztiz onbera.
Zerua lurretik goi dagoen adinean,
goi da Haren maitasuna beldur diotenen gainean. R/.

II. IRAKURGAIA: 1 Ko 10, 1-6. 10-12

*Herriaren bizitza Moisesekin basanortuan,
gu zentzarazteko idatzi zen.*

San Paulo Apostoluak Korintotarrei

Senideok: Ez zaituztet ezjakinean eduki nahi; gure arbasoak denak egon ziren hodeipean; denek igaro zuten itsasoa; eta hodeian eta itsasoan denek hartu zuten, Moisesi lotzen zituen bataio bat; denek jan zuten espirituzko janari berdina, eta denek edan, espirituzko edari bera; berekin batean zihoan espirituzko harkaitzetik edaten baitzuten; harkaitza, berriz, Kristo zen. Haietako asko eta asko, ordea, ez zitzaizkion atsegin izan Jaungoikoari; eta hilda gelditu ziren basamortuan.

Gauza hauek aurreirudi gertatu ziren guretzat, guk gaiztakeriarik irrika ez dezagun, haiek irrikatu zuten bezala. Ez zaitetzela marmarrean ari, haietako batzuk ari izan ziren bezala, eta heriotza emailaren esku hil ziren.

Guzti hau gure ikasbiderako gertatzen zitzairen; eta gu, azken aldi honetan bizi garenok, zentzarazteko idatzi zen. Beraz, zutik dagoela uste duenak, begira beza eror ez dadin.

EBANJELIOA: Lk 13, 1-9

Ebanjelio aurreko txatala: Mt 4, 17

V/. Bihotz-berri zaitetzte —dio Jaunak—,
hurbil da eta zeruetako erreinua.

*Bihotz-berritzen ez bazarete,
guztiok berdin galduko zarete.*

Jesu Kristoren Ebanjelioa San Lukasen liburutik

Aldi hartan, etorri zitzaizkion Jesusi batzuk, galilear batzuri gertatutakoaren berri ematera: Pilatok galilear haien odola beren opariekin nahastu omen zuela, alegia. Jesusek erantzun zien: «Uste al duzue, galilear haiek beste galilearrak baino bekatariago zirela, horrelako azkena izan zutelako?»

Ezetz diotsuet; eta bihotz-berritzen ez bazarete, guztiok berdin galduko zarete.

Eta Siloeko dorrea gainera erorita hil ziren hemezortzi haiek ere, uste al duzue, beste jerusalendarrak baino errudunagoak zirela? Ezetz diotsuet; eta bihotz-berritzen ez bazarete, guztiok berdin galduko zarete».

Eta parabola hau esan zien: «Pikondo bat zeukan gizon batek, bere mahastian landatua. Eta piku bila etorri, eta ez zuen aurkitu. Orduan honela esan zion mahastilariari: "Bada hiru urte, pikondo honetara piku bila natorrela, eta ez dut pikurik aurkitzen. Moztu ezazu. Zertarako eduki lurra alferrik?"

Mahastilariak, ordea, erantzun zion: "Jauna, utzazu aurtengoz; ingurua aitzurto eta ongarrituko dut; ea fruiturik ematen duen. Bestela, datorren urtean moztuko duzu"».

Oparigaien gainekoa

Opari honek, Jauna, irits diezagula
eskaten dizugun barkamena,
eta geure zordunei barkatzera eraman gaitzala.
Jesu Kristo.

Jaunartze ondorengoa

Betiko salbamenaren agiria dugu, Jauna,
hartu dugun oparia;
egizu, orain sakramentuz ematen zaiguna
bere betean irits diezagula geroko bizitzan.
Jesu Kristo.